

廂蓋滿名臣傳 卷二十七



可  
之  
玉

八旗通志初集卷之一百六十七

名臣列傳二十七

鑲藍旗滿洲世職大臣一

碩翁科洛巴圖魯安費揚武子阿爾岱敦先達

孫赫色

孫塔

馬錫泰

杜爾德

穆克譚巴圖魯

子艾音塔木

那桑阿

孫

吳巴海

喀山

子納海

舒賽

子西蘭

孫席

沙爾虎達



巴海族人達爾珠 戴察 朱什里

碩翁科洛巴圖魯滿洲鑲藍旗人。姓覺爾察氏。本名安費揚武。世居瑚濟寨地方。其父完布祿章京事。

太祖高皇帝有章甲尼麻喇人誘令謀叛不從。又劫其孫以要之。終無二志。安費揚武克繼父志。自弱冠從。

太祖四征不庭。竭誠効力。撤爾湖城長諾米納兄弟。與尼堪外蘭通謀。安費揚武從。

太祖往討。率衆擊諾米納兄弟。及其軍士盡殲之。兆嘉。

城長李岱導哈達兵三百人劫湖濟寨而去。碩翁科洛巴圖魯適出獵歸，即率所領十三人追及之，敗哈達兵，殺四十人，盡奪所掠子女以歸。尋從大兵取嘉兆城，身先奮戰，李古里札秦走附江上之汪泰，安費揚武奉。

命往招並汪泰降之，尋同大兵攻取馬兒墩寨，戰三日，皆為軍前鋒。又統兵征哲陳部，乘夜攻拔其城。城長阿爾泰竄走，追斬之。又攻洞城及王甲章甲尼麻喇赫徹穆等城，皆著功績。又率兵取香

潭寨，寨長李敦拜湖遁，追及於碩郭之陽，擒之。從畧哈達富免家齊寨，師還，敵兵來追。

太祖親殿後，賊兵突前掩至。

太祖方迎射前一騎，後三騎乘間揮刀來犯。安費揚武

截擊盡斬之。癸巳年九月，葉赫等九國合兵來侵。安費揚武隨大兵奮戰破敵，九國敗走。己亥年，從大兵攻哈達城，先登拔之。十月，訥殷路搜穩塞克什，聚七寨人，據佛多和山寨而居。閏十一月，奉。

命同額亦都巴圖魯噶蓋扎爾固齊督兵千人往征之。圍其寨三月乃下。斬搜穩塞克什而歸。辛亥年。同阿巴泰台吉等率兵一千征東海兀集部之烏爾古宸。木倫二路取之。戊申年從征烏喇。敗敵有功。十二月。

太祖特命與費英東扎爾固齊額亦都巴圖魯達爾漢轄何和理額駙同為五大臣。癸丑年春正月從太祖親征烏喇。安費揚武擊達拉木台吉兵。摧其陣。奮勇登城。先樹大纛於城門之上。大兵繼至。遂滅。

烏喇。天命元年七月。同達爾漢轄征薩哈連部。至兀爾簡河。水陸並進。取河南河北諸寨。凡三十有六。八月。兵至黑龍江南岸。其江每歲九月始冰。是日見江水結冰橋一道。寬二里許。引兵渡之。遂取薩哈連部內十一寨。及回兵時。冰橋已解。其西偏復結冰一道如前。咸驚為天助焉。又降使犬諸路長四十人。始班師。四年。大兵攻明取撫順。安費揚武率衆先擊。破其左營。援兵。又與額亦都巴圖魯攻馬根單。花豹衝。三岔兒。

堡下之。安費揚武秉性貞亮。有勇畧。自癸未年  
來歸。即從征伐。開國功臣。惟安費揚武與額亦  
都二人。効力最先。並以早歲行兵。迄於白首。  
戰輒居前。還則殿後。屢受重傷。多樹勲伐。

太祖嘉安費揚武功。賜名碩翁科洛巴圖魯。猶漢言鷲  
勇云。官至固山額真。天命七年卒。年六十四。

世祖章皇帝順治十六年三月。追謚敏壯。建碑墓道。  
賜阿達哈哈番世職。令其子席爾岱。達爾岱。分襲。康熙  
三十七年。

聖祖仁皇帝謁

陵至盛京。特遣大臣往奠墓次。後其孫襲職時。所司以  
例議裁其

恩詔所加官。

聖祖追念碩翁科洛巴圖魯為開國勲臣。不允裁減。令  
兼襲焉。子八人。長碩爾輝。在十六章京之例。第  
四子阿爾岱。初任牛录章京。天命六年。駐防耀  
州。有明兵來犯。率衆列陣拒戰。擊敗其軍。屢從  
征伐。論功授備禦世職。天聰五年。從征明大凌

河。城內敵兵突出。身先衆兵。奮勇衝殺。遂歿於陣。從優卹贈。加世職為三等甲喇章京。第六子達爾岱。初任擺牙喇甲喇章京。天聰五年。從征明大凌河。往守臧家堡臺。遇敵兵百人突走。追殺十四人。崇德元年。隨

太宗文皇帝親征朝鮮。我蒙古兵前往納馬山牧馬。敵兵橫截來戰。達爾岱奮擊敗之。殺四十餘人。擒六人。尋率兵步進。連破敵營二座。三年八月。隨揚威大將軍貝勒岳托。征明。往北京埋伏。遇明

馬兵數百。同勞薩碩翁科洛巴圖魯擊敵有功。六年三月。我師征明圍錦州。有松山兵來犯我。紅衣礮。率擺牙喇兵奮擊退敵。敵兵乘雨後。侵我右翼汎地。偕衆往援。力敗其軍。又錦州城敵兵出戰。同燾章京德爾德赫領兵接戰。却之。併敗其採樵步兵。八年九月。隨鄭親王濟爾哈朗。征明寧遠。敵兵出城拒戰。領燾前進。敗之。順治二年正月。叙功授半個前程。世職。七年。遇

恩詔。追念伊父碩翁科洛巴圖魯之功。超加為三等阿

達哈哈番九年遇二次

恩詔加至一等阿達哈哈番第七子敦克初任噶布什  
賢章京順治元年四月隨睿王多爾袞入山海  
關遇流賊偽總兵唐通兵數千同噶喇昂邦席  
特庫率衆掩殺敗之又追流賊至安肅縣生擒  
哨騎三人又隨固山額真譚泰率兵長驅北逐  
流賊殲其步卒二年正月叙功授半個前程世  
職六年任擺牙喇甲喇章京七年九年三遇  
恩詔屢加至三等阿達哈哈番康熙元年卒兄子赫色

襲二十年三月赫色隨征南大將軍都統賴塔  
由廣西進雲南征逆孽吳世璠破黃草壩地方  
直至雲南城同三路大兵平定雲南二十五年  
議叙加授世職為二等阿達哈哈番

孫塔碩翁科洛巴圖魯安費揚武長子碩爾輝  
之次子也天聰八年五月以其供事勤慎授牛  
录章京世職崇德三年八月隨揚威大將軍貝  
勒岳托征明山東遇盧軍門兵奮勇進擊敗敵  
者三我師出邊時明兵尾後襲追孫塔同圖賴



等。回兵接戰。敵乃退。明兵復乘間奪我喀喇沁  
兵所駐山巔。孫塔同圖燕圖。率兵往援。擊敗敵  
衆。六年八月。大兵再圍錦州。孫塔同梅勒章京  
藍拜。連破明經畧洪承疇三營兵。敵人乘雨後  
來犯我右翼汛地。復同梅勒章京藍拜步戰却  
之。八年十月。管甲喇章京事。順治元年四月。隨  
睿王多爾袞進山海關。擊流賊有功。二年正月。  
議叙。授世職。為三等甲喇章京。三年正月。隨靖  
遠大將軍肅親王豪格。征四川。至漢中府。擊賊  
首何進。同尚書覺羅巴哈納。敗之。至西充。賊渠  
八大王張獻忠。親率兵拒敵。孫塔同梅勒章京  
席特庫。奮勇前擊。連破敵營。我軍至南陽。賊帥  
郝總兵來拒。同固山額真墨爾根。擊走之。尋  
奉

命戍守淮安。有賊攻破海州城。旋遁去。孫塔率兵追至  
馬竒山。及之。賊扎寨拒敵。孫塔陣斬賊渠曹良  
臣。盡殲餘黨。五年八月。任刑部理事官。六年十  
月。陞戶部侍郎。管理鹽法。駐劄揚州。七年正月。

遇

恩詔加世職為一等阿達哈哈番。五月總理漕儲。九年遇二次。

恩詔加世職為三等阿思哈尼哈番。回京補本旗梅勒章京。尋陞工部尚書。十三年九月考滿。廕一子入監讀書。十五年三月監修。

上帝壇

奉先殿工成議叙。加世職為二等阿思哈尼哈番。八月遷蒙古固山額真。十七年二月遷。

諭自陳解尚書任。專管固山額真事。十八年十二月同定西將軍公愛星阿統大兵抵緬甸阿娃城。獲偽桂王朱由榔有功。康熙三年議叙。優加世職為一等阿思哈尼哈番。又兼一拖沙喇哈番。四年五月轉本旗滿洲都統。十二月以疾卒。予祭葬如典禮。謚忠襄。

馬錫泰孫塔子也。康熙五年正月襲伊父一等阿思哈尼哈番。又兼一拖沙喇哈番。任前鋒叅領。十四年三月隨撫遠大將軍多羅信郡王鄂

扎。征察哈爾布爾尼。至大魯地方。敗賊。乘勝過山。勦殺。又敗其山溝。伏兵。察哈爾布爾尼。聚殘兵來戰。復連敗之。四月。凱旋。加世職。為三等精奇尼哈番。十六年。從征逆藩吳三桂。四月。率兵赴吉安。十七年。五月。陞本旗蒙古副都統。十八年。十二月。轉本旗滿洲副都統。十九年。六月。隨鎮南將軍莽依圖。由廣西進。勦逆孽吳世璠。至賓州陶屯地方。敗偽將軍范齊韓詹仰等。二十年。正月。隨征南大將軍賴塔。奪石門坎。破黃草

壩。直至雲南城下。同三路大兵。平定雲南。七月。同都統希佛。率兵往楚雄。追賊帥馬寶。巴養元至烏木山。降其衆。二十五年。叙功。加授世職。為一等精奇尼哈番。三十年。四月。以老病致仕。杜

杜

爾德。碩翁科洛巴圖魯第四子。阿爾岱之子也。

天聰八年。襲伊父三等甲喇章京世職。順治元年。正月。任刑部理事官。四月。隨睿王多爾袞。進山海關。同燾章京德爾德濟破流賊有功。十月。隨定國大將軍豫親王多鐸南征。由河南進至

潼關流賊駐立山頭。杜爾德擊敗其衆。回兵時賊兵來追。率擺牙喇兵殿後截戰。賊衆乃奔。明日率我兵潛伏潼關。擊敗流賊數千。又擊流賊第二營步兵克之。二年正月叙功。優加世職。為二等甲喇章京。三月隨豫親王多鐸往定河南。有賊將劉方亮率兵千餘來窺我營。杜爾德同敦拜率擺牙喇兵往擊。大獲全勝。五月同宗室韓岱等率師至揚州城北。破敵兵。獲船百餘艘。隨大兵追明偽福王至蕪湖。福王登舟欲渡江。

隨固山額真公圖賴等截其去路。擊敗偽靖國公黃得功。三年五月加授世職。為一等甲喇章京。十一月隨征南大將軍多羅貝勒博洛進征福建。同噶布什賢章京伊拜等攻下建寧。延平等府。偽唐王朱聿釗遁走汀州。復隨阿濟格尼堪等率兵追襲。直抵城下。擒斬聿釗。及偽曲陽王朱盛度。並偽官偽伯等。遂定汀州。五年二月陞本固山纛章京。五年隨定遠大將軍鄭親王濟爾哈朗征湖廣流賊。六年十二月賊渠王強

犯沅州。杜爾德同阿哈尼堪破之。斬偽副將三人。賊兵七百餘級。獲馬七千餘匹。七年遇

恩詔。加一拖沙喇哈番。八年七月。任議政大臣。九年遇  
二次

恩詔。加世職至一等阿思哈尼哈番。康熙三年七月卒。  
予祭葬如典禮。謚忠襄。

穆克譚。巴圖魯。滿洲鑲藍旗人。姓戴佳氏。世居  
哈達之杭澗地方。

太祖高皇帝未滅哈達時。隨父率衆來歸。始編牛錄。令

其管轄。每從征伐。所至前驅。屢建奇績。諸將中  
孟庫之父曰查海胡色者。叛之。哈達穆克譚同  
父暨四兄追之。父兄俱歿於陣。穆克譚從子厄  
爾諾亦叛。歸哈達。穆克譚隻身往追殺之。天命  
元年。我師征瓦爾喀。舒賽阿爾虎達進戰。孟庫  
噶哈二人輒先敗走。我兵先進戰者三人死焉。  
穆克譚怒。奮不顧身。同燕布理等八人直衝入  
陣。賊衆披靡。舒賽阿爾虎達得以身免。師還。  
太祖治孟庫噶哈罪。盡奪其所獲。賜穆克譚。天命六年

二月。從征明耀州。穆克譚先登。克其城。尋奉命駐防耀州。有蒙古人叛去。我兵十九人追及之。與戰不利。穆克譚獨奮勇直前。策馬衝突。大呼曰。穆克譚至矣。鎗刺首。逃者海色餘。皆潰。叙功。授二等副將。世職。十一年八月。

太宗文皇帝御極。擢置十六大臣之列。出治戎兵。入理詞訟。天聰元年四月。隨大貝勒阿敏濟爾哈朗征朝鮮。凱旋。以二次登城功。賞人馬各八。六月。阿山。阿達海等自謂奇男子。有才不得錄用。叛

往歸明。大貝勒阿敏乘夜追及。射殺其二子。阿山亦被創。兄弟潰散。穆克譚單身追射阿達海。阿達海接戰。刀砍穆克譚墜馬。幾死。遂得重傷。五年八月。從征明大凌河。隨固山額真篇古阿格圍錦州。我師四面進戰。穆克譚以本旗兵徑抵城壕。舍騎步戰。迫敵入壕。敵壕岸兵與城上兵礮矢齊發。我兵不得進。城內敵兵復出。並力拒戰。穆克譚身先衆兵。奮勇擊敵。遂歿於陣。

太宗聞之。歎曰。穆克譚我舊臣。今死非其地。殊為可惜。

六年正月卹贈一等副將世職。賞銀八百二十兩。順治十二年十月。追謚忠勇。立碑墓次。以示寵異。子三人。長溫察。任郎中。次艾音塔木。天聰六年正月。襲伊父一等副將世職。順治元年四月。隨睿王多爾袞。入山海關。破流賊有功。十二月。隨定國大將軍豫親王多鐸。南征。由河南入潼關。同梅勒章京沙爾虎達。率噶布什賢兵三次埋伏。連敗賊兵。師還殿後。敗賊追兵二次。二年三月。官兵分三路趨歸德。定河南。旋進征江

南。獲偽福王。俱在行間有功。三年九月。隨定南大將軍佟圖賴兵。至寶慶地方。敗偽總兵馬盡忠。王進才等。遂復寶慶。六年。隨定遠大將軍濟爾哈朗。征湖廣流賊。八月。同尚書阿哈尼堪。師抵洪江。賊首袁宗第。二隻虎。在江對岸列十營。接戰。艾音塔木。隨衆渡江。擊破其衆。十二月。同阿哈尼堪。敗賊王強於沅州。又敗二隻虎等賊兵。七年。九年。三遇。

恩詔。加世職至二等精奇尼哈番。十一年十二月。隨靖

南將軍朱瑪喇征廣東抵新會縣攻偽安西王李定國於山峪十三年叙功加世職為一等精奇尼哈番又兼一拖沙喇哈番康熙十九年二月以疾卒

子祭葬如典禮第三子那桑阿初任五品官順治十六年三月隨安遠靖寇大將軍信郡王羅可托追勦偽桂王至魯噶地方偽晉王李定國率四侯三伯偽將軍等立寨拒敵徒步隨官兵往擊連敗其衆定國遁康熙十三年八月隨平寇將軍

哈爾哈齊護軍統領桑額往征逆藩耿精忠擊賊於江西建昌府有功九月同定南將軍希爾根困撫州耿逆偽都督易天錫率兵五千出城與建昌來援兵七千兩路夾犯我兵分頭迎戰大敗逆賊遂復撫州又偽將蔡德率兵四千犯進賢縣那桑阿往擊敗之十四年三月偽都督楊益茂領賊六萬衆在七里岡列陣拒戰那桑阿同覺羅舒恕敗其衆進至弋陽縣敗偽總督單德弘偽總兵柯勝等又敗偽總兵郭先張文



孝賊兵於艾山。十七年正月。護軍統領哈克山。敗偽將軍韓大任賊兵萬餘於老虎洞地方。並在行間有功。二十五年議叙。授拖沙喇哈番。艾音塔木子公圖。初襲父一等精奇尼哈番。又一拖沙喇哈番。二十九年八月。公圖隨撫遠大將軍伯費揚古。征厄魯特。噶爾丹由西路進兵。遇賊兵於昭莫多。擊賊有功。三十六年五月議叙。又加一拖沙喇哈番。授三等伯。病故。子噶敏圖襲。

特授內閣學士兼禮部侍郎。教習庶吉士。旋陞戶部侍郎。又溫察之孫薩賴。仕至副都統。扎賴。仕至侍郎。吳巴海。滿洲鑲藍旗人。姓瓜爾佳氏。世居烏喇地方。天命三年。從

太祖高皇帝征尼堪外闡有功。授備禦世職。天聰元年。四月。隨大貝勒阿敏。濟爾哈朗等。征朝鮮。凱旋。以二次登城功。賞人馬各四。五月。隨大兵征明錦州。我師攻城未下。敵兵出城犯我汛地。吳巴

海殿後督戰。敵乃退。五年三月。同孟阿圖征瓦爾喀有功。還。

太宗文皇帝郊迎十里外。朝見畢。以所獲婦女皮幣馬牛獻。

太宗設宴勞之。六年六月。同席湯噶追我國亡者。途遇察哈爾國五人。俱斬之。獲馬十六匹。

太宗即以其馬賜之。十二月奉

命征烏扎喇地方。吳巴海分遣將領。每二旗兵合為一路。四路並進。聞敵在握黑河捕魚。我兵直入斬

三百三十八人。獲男婦幼小七百。馬牛皮張等物甚多。七年正月。同備禦郎格。攜寧古塔邊外貨物。赴朝鮮會寧城貿易。九月。叙功。賞人二口。緞二疋。布二十疋。紀錄一次。十一月。同季什哈率官八員。兵三百名。往征虎爾哈部落。八年五月。吳巴海奏捷。俘婦女百口。男子五百五十五名。共婦女幼小一千四百。馬牛皮幣等物無算。十二月。又同荆古爾代。率每旗將領各一員。每牛象甲士各一名。共四百人。往征瓦爾喀。九年

四月奏捷收服壯丁五百六十人。婦女五百名。又進獻婦女六十六口。馬牛皮張無算。六月又報得編戶壯丁六百人家口一千三百八十馬。牛皮張等物甚衆。尋攜招降虎爾哈部落人凱旋。

太宗命禮部大臣郊迎宴勞。即以所獲之物賜之。八月隨貝勒岳托駐防歸化城。聞博碩克圖之子使人往明。疑必有與之同往者。岳託遣吳巴海同阿爾津等四人要於道。果遇其使十人。並明使

者四人。全執以歸。獲馬一百八匹。駝三十七隻。又往追俄綽克。殺蒙古頭目一員。兵二十一人。獲婦女五十。馬二十匹。牛十八頭。並獲兀山馬匹以歸。十年二月叙功。授一等甲喇章京世職。崇德元年六月。以吳巴海曾率兩旗兵。征厄勒約鎖厄黑庫倫地方。俘獲人丁甚多。編為戶口。太宗嘉其善於用兵。授三等梅勒章京世職。十二月喀木尼漢部落葉雷等率妻子攜牲畜逃去。吳巴海率寧古塔兵一百。科爾沁國土謝圖親王。卓

禮克圖親王。兵六百。出邊行五十日。至溫朵地方。追及之。諭令歸降。葉雷不從。遂攻入。殺四十九人。獲其妻子八十七口。馬五十七匹。葉雷遁入深山。隨同席特庫率兵追及圍之。復令歸降。終不聽。遂射殺葉雷。並殺同伴諸人。二年五月。凱旋。

太宗嘉其功。命固山額真等出迎五里。宴勞之。六月。議叙軍功。以吳巴海駐鎮寧古塔數年以來。克盡厥職。屢著勲猷。超加世職。為三等昂邦章京。

賜衣服馬匹。奴僕莊田。四年七月。以疾卒。從子傳喀襲職。

喀山。滿洲鑲藍旗人。世居葉赫蘇完地方。天命四年。於葉赫未滅之先。即率族屬來歸。

太祖高皇帝以其智勇。授備禦世職。六年三月。取遼陽。克河東七十餘城。並在行間。著有功績。加世職。為遊擊。九年。明島帥毛文龍部下守備二員。率兵百人。來犯康古禮額駙庄。喀山往援。斬二守備。盡殲其衆。天聰八年二月。隨官兵征大同。同

吳拜克敵二次。加世職為三等梅勒章京。尋以目疾失明辭職。

世祖章皇帝順治二年。以其撫育公主有勞。優加至一等梅勒章京。世職。七年九年。三遇

恩詔。加至二等精奇尼哈番。十二年十月卒。謚敏壯。照一品大臣例立碑。十一月。長子納海襲納海。以天命四年。同父來歸。任牛录章京。天聰元年五月。從大兵征明錦州。攻松山。納海同喀扎海。由塔山馳往。殺明步兵五十人。明總兵祖大壽步

兵來援。欲入杏山。納海同噶布什賢胡密色。索渾擊敗之。我兵回時。有敵人馬兵五百。自錦州來躡我後。納海隨昂邦章京席特庫接戰。殺二十人。獲馬六十四匹。餘兵盡潰。二年。大兵復征

明圍錦州。擊杏山馬兵。同噶布什賢章京等克敵有功。崇德四年三月。偕胡密色等畧地杏山。獲牛三十九頭。羊三百餘隻。五年九月。大兵圍錦州。敵兵出城築臺。率噶布什賢章京等馳往。擊蒙古步兵四十人。俱斬之。尋同色赫等赴小

凌河口。遇錦州蒙古兵十七人。亦斬之。六年三月。圍錦州。明步兵出城外取草。納海同布丹。沙爾虎達。追殺四十二人。敵兵二次犯我哨騎兵汛地。同噶布什賢章京等往擊。敵遂退。八月。擊明軍門洪承疇步兵。連破敵營三座。並敗其馬兵數百。七年二月。我師圍松山。洪承疇衆兵自城內遁出。率噶布什賢章京等橫截。殺入。明兵敗奔杏山。我兵乘勝追殺。至筆架山。斬首四百餘級。獲馬二百四十二匹。旗六杆。並擒哨騎二

十八人。殺四十一人。三月。叙功。授半個前程。世

職。順治七年。

九年三月遇

恩詔。加至三等阿達哈哈番。十二年十一月。並伊父二等精奇尼哈番合襲。加為二等伯。十七年二月。卒。弟納秦襲。

舒賽。滿洲鑲藍旗人。姓薩克達氏。世居薩克達地方。生而勇敢。天命四年。授備禦世職。先從大兵征哈達國有功。又征瓦爾喀什地方。率兵進戰。克敵總叙前功。加授遊擊世職。凡進攻敵城。

太祖高皇帝愛其勇。輒戒令勿先登。舒賽不從。強衣綿甲。奮身直前。先後攻克十六城。並著奇勲。超加副將世職。十一年八月。

太宗文皇帝即位。擢置十六大臣之列。內勦國政。外斷民訟。天聰元年三月。同阿山等駐防義州。八年五月。隨貝勒濟爾哈朗。駐鎮

盛京。崇德六年十月。以疾卒。

予祭葬如典禮。順治十二年十月。追謚壯敏。照一品大臣例立碑。子西蘭。早事戎行。屢立功績。

太宗文皇帝以其智勇堪用。授牛录章京。世職。崇德八年十二月。隨梅勒章京鄂羅塞臣等。征黑龍江。獲二十二人。以歸。順治元年。從豫親王多鐸南征。十月。同梅勒章京喇麻擊流寇。敗敵者再。十二月。大兵抵潼關。流賊三次犯我汛地。西蘭奮勇往擊。連敗賊衆。又同滿都護敗賊於平和縣。二年五月。隨貝勒博洛等。趨杭州。我兵至松江府。遇偽大學士馬士英等。率兵拒敵。西蘭偕衆將迎戰。大敗之。降其城。叙功。加半個前程。世職。

七年正月遇

恩詔。加至三等阿達哈哈番。仕至護軍叅領。西蘭子席特庫。以崇德六年十月。襲伊祖舒賽三等梅勒章京世職。八年十月。從大兵征明。攻前屯衛城。內敵兵出戰。席特庫同覺善擊敗之。斬明總兵李賦明等三十餘員。兵四千級。俘二千人。遂拔其城。順治元年四月。隨睿王多爾袞大兵至山海關外。擊敗流賊。六月。隨固山額真葉臣往平山西。取太原府。環視進攻地界。城內步兵突出。相拒。力戰敗之。進至陝西延安府。賊兵乘夜來劫我營。連擊退之。七月。隨覺羅巴哈納等追賊田侯。同孟阿圖力戰敗賊。又擊流賊營兵。俱著功績。旋同梅勒章京阿喇善。肅章京哈寧阿等往尋賊踪。途遇賊吳伯兵三千。奮擊破之。三年叙功。加世職為二等梅勒章京。是年以疾卒。子常舒襲。

沙爾虎達。滿洲鑲藍旗人。姓瓜爾佳氏。世居胡爾海地方。天命十年來歸。從



太祖高皇帝征瓦爾喀有功。授備禦世職。天聰元年五月。以噶布什賢章京。隨大兵征明錦州。四年二月。同圖魯式勞薩等。為噶布什賢章京捉生。途遇明哨卒。擊敗之。獲馬十七匹。生擒二人。五年十二月。同碩詹。席特庫等。往明國境上捉生。殺三人。擒一哨長。獲五人以歸。八年二月。同勞薩。色楚等。率擺牙喇精騎八十名。廝卒四十名。往錦州捉生。並齎

諭祖大壽書。至十三站山坡。懸書而還。九年五月。同各旗大臣扎福尼等。率每牛录下擺牙喇一名。往濟貝勒多鐸軍。十月。追叙沙爾虎達。同霸奇蘭。征黑龍江功。加世職一等。尋同蘇達喇等。率兵七十名。往錦州一帶捉生。擒十一人。斬二人。獲馬二匹。騾二頭。驢二頭。牛二十一頭。還。即以所獲

賜之。崇德二年七月。同吳拜努山等。率壯大八員。擺牙喇一百名。往畧歸化城。三年八月。同吳拜。率噶布什賢兵四十名。蒙古兵四十名。至洪山口。遇

明千總二員。兵百人。陣斬二千總。獲馬二匹。又敗羅文峪明兵五百騎。獲馬四十匹。大燾二。又敗密雲縣步兵一百二十七人。並明八隊。邏卒盡殺之。十月。同喀查海等三章京。率噶布什賢兵五十人。往明義州一帶捉生擒八人。以獻。四年四月。同噶布什賢章京席特庫。率官兵一百五十人。往錦州界外。畧取牲畜。並捕燒炭斫木者。五月。至錦州。遇敵兵擊敗之。俘二十二人。獲馬六十一匹。牛一百九頭。驢二十三頭。比還。

太宗文皇帝。即以所俘獲賜之。十一月。同席特庫。率土默特部落兵二百人。往寧遠。

太宗諭之曰。爾等從寧遠北界入。沙爾虎達。蘇爾德。鄂碩布丹等。四章京。可前進誘敵。令後隊伏於近邊。臺軍瞭望不見之所。以備截擊。若誘之不出。所伏之兵。再俟一日。待會齊同還。數日後。可仍從錦州北界進取。樵採之人。沙爾虎達等。遵

諭行。多所斬獲。五年三月。叙功。授二等甲喇章京世職。六年八月。任噶布什賢。喇昂邦。隨

太宗親征錦州。

賜以上駟。諭之曰。爾素日行不逮言。今番如遇敵自杏山遁去。爾等於西台橫截大路。尾踪追擊。勿容進城。沙爾虎達應曰。臣幾曾臨陣候事耶。後杏山兵果敗。沙爾虎達竟不追襲。致敵兵進城者衆。

太宗命剛林希福等勘問云。爾更有何辭以對。沙爾虎達對曰。殺之惟有一死。宥之當効力疆場。剛林希福等以其言奏聞。

太宗赦其罪。革噶布什賢噶喇昂邦職。七年九月。同葉赫朱瑪喇往征虎爾哈部落。閏十一月。沙爾虎達等遣人報捷。言喀爾喀木等北十屯人民俱已招降。共獲男婦幼小一千四百五十八名。於是月初十日。自松阿里江處起行。約十二月初五初六日可至。八年正月。沙爾虎達等凱旋。

太宗命禮部大臣迎宴入城。叙功賞以緞布。順治元年正月。征庫爾喀部落。復有功。五月。同鄂羅塞臣征黑龍江。仍大獲凱旋。

世祖章皇帝遣明安達里等往迎宴勞之。即

賜以所獲貂皮諸物。十二月隨定國大將軍豫親王多鐸南征。同艾音塔木連敗賊兵。旋進師潼關。殿後。有流賊兵三次來犯。同艾音塔木屢擊敗之。二年六月。隨貝勒博洛進師杭州。大敗明兵。多著奇績。三年五月。叙功授一等甲喇章京。世職。四年十月。率官兵駐防東昌。十二月。聞賊首丁維岳。張中克。肆毒東兗。率兵往援。盡殲其衆。賊渠當陣授首。五年四月。任燾章京。為議政大臣。六年七月。河間一路土寇竊發。率兵勦撫平之。

七年三月。調為滿洲固山梅勒章京。三遇

恩詔。加世職至一等阿思哈尼哈番。尋往駐防寧古塔

地方。十年五月。陞昂邦章京。十四年二月。

世祖特賜蟒衣貂帽鞍馬腰刀緞布。十五年七月。擊敗羅刹兵。獲其人口甲仗等物。十六年正月。以疾卒。

世祖特諭吏部。寧古塔係邊疆要地。昂邦章京沙爾虎達。防守有年。人心咸服。今已長逝。其子巴海。素著敏慎。堪勝此任。着即代其父。為昂邦章京。前往駐防。三

月沙爾虎達喪至

京師

特命內大臣公愛星阿侍郎寧古里齋茶酒往奠之。閏三月遣官諭祭。五月追贈太子太保。謚襄壯。立碑墓道。

巴海沙爾虎達長子也。順治十六年正月代伊父為昂邦章京鎮守寧古塔地方。九月始襲伊父一等阿思哈尼哈番。十七年七月偕副都統尼哈里等率兵至薩哈連松阿里兩江合處偵

聞羅刹賊衆在費牙喀國西界領兵前進抵使狗地方我兵船潛伏兩岸賊艘奄至伏發賊即回遁督兵襲追賊棄舟登岸倒戈敗走斬首六十級溺死者甚衆獲婦女四十七口並火礮盔甲器械等物招降費牙喀國十五村一百二十餘戶康熙四年八月改職銜為鎮守寧古塔將軍十年九月

遣侍衛往賜裘帽等物十月

聖祖仁皇帝詣盛京謁

陵。至愛新地方駐蹕。召巴海。問寧古塔及瓦爾喀虎爾哈人民風俗。奏對明敏。

聖祖諭之曰。朕向聞爾賢能。今侍朕左右。朕益知爾矣。費牙喀黑折雖服。然其性暴戾。瓦爾喀虎爾哈人皆奸詭。爾當善為防之。廣布教化。多方訓迪。以副朕懷。遠至意羅刹。雖云投誠。務加意防禦。操練士馬。整備器械。毋墮狡計。至於地方。應行大事。即行陳奏。毋得疑畏。爾膺邊方重任。尚其黽勉。以報朕知遇之恩。十三年十一月。率松阿里烏喇等處墨爾折勤氏。

新滿洲佐領四十員。並佐領下人入覲。十四年正月。

特賜元狐裘貂朝衣各一襲。時察哈爾布爾尼作亂。三月。同倭內巴圖魯奉。

命固守。

盛京十七年閏三月。

聖祖特諭吏兵二部曰。宣猷効力。臣子之常經。晉秩酬庸。國家之大典。鎮守寧古塔將軍巴海。蒞任以來。彈壓巖疆。展布宣畧。實心任事。籌畫周詳。允為稱職。出

其智謀。將札奴喀等新滿洲。移居寧古塔。分佐領。授室家。咸令得所。懷柔遠人。有裨軍國。殊屬可嘉。應給世職。以示鼓勵。優賞一等阿達哈哈番。世襲。因替二十一年二月。

聖祖幸盛京。駐蹕阿爾灘訥門地方。巴海來朝。四月。賜宴。並袍服鞍馬緞疋等物。二十二年四月奉

命駐鎮烏喇。六月。緣事部議革去將軍。並世職。奏入

聖祖。特諭兵部曰。巴海移居各姓新滿洲。厥功最茂。著留其一等阿達哈哈番世職。餘世職及將軍任。悉革

去。二十三年五月。陞本旗蒙古都統任議政大臣。二十五年二月。以疾卒。

予祭葬如典禮。達爾珠沙爾虎達之族人也。早年効力戎行。崇德二年八月。隨揚威大將軍貝勒岳託。征明。我兵攻靈壽縣。達爾珠奮勇登梯。繼根特以第二人登城。遂克其城。四年叙功。授半個前程。世職。順治七年九年。三遇

恩詔。加至三等阿達哈哈番。十一年正月病故。子戴察襲職。是年六月。隨靖南將軍固山額真朱瑪喇。

往征廣東。十二月在新會縣山峪敗偽安西王李定國步兵四萬餘。迨至興業及橫州地方。定國遁去。乃班師。十五年正月。隨安遠靖寇大將軍信郡王多尼等進征雲貴。官兵至魯噶地方。偽晉王李定國率偽侯偽伯將軍等馬步兵一萬七千列陣相拒。戴察隨大兵進戰。連破之。十八年論功。加世職為二等阿達哈哈番。是年卒。六月。子朱什里襲。康熙十九年。隨征南大將軍賴塔。征逆孽吳世璠。二十年三月。由廣西進雲南。至黃草壩地方。擊偽將軍何繼祖等。敗之。直抵雲南城下。會同三路大兵。敗偽將軍胡國柄等。平雲南。在事有功。二十五年議叙。加授為一等阿達哈哈番。







